

## FANM

Fanm potomitan an kaz  
Dòmni ta, lévé bonnè  
Sé on ti flè a onlo koulè.  
Dékèkfwa i ozabwa, ka pwan gaz,  
Men i toujou douboutpikan,  
Bèl kon lanmou antan lontan.

Fanm manman kyolé zanfan  
Ou ka tousèl pou koupé haché  
Ba lavi dématé  
Ren maré séré  
Kay woulé pipiritchantan.  
I vlé pitit ay grandi  
Pwan on chimen i pani yoyodi.

A fanm ! Ou sav fè atann !  
Fanm dousin  
Zòrèy fin  
Fanm menndé  
Pavlé ni lenbé  
Fanm an pil  
Pè ay adan vil  
Fanm byen doubout  
Paré pou tout  
Fanm siwo  
Enmé yenki bo  
Fanm a wòl  
Vépa kwè tout pawòl

Fanm flann  
Péké étenn avè dlo anbenn  
Fanm ras  
Lité pou plas  
San janmé las.  
Lésé tras  
Fanm ! pa di ou téké,  
Lévé tèt aw, di ou pé.....

FANM OU SE FANM RETE FANM